

粵西叢載

清江森編

第八冊

進步書局校印

藤峽

大藤峽在萬山中。盤礴六百餘里。以桂平大宣鄉崇姜里為前庭。象州東鄉武宣北鄉為後戶。而右貴縣之龍山。左藤縣之五屯。若兩臂然。峽以北巢岡不可殫名。而西羅浮東紫荆。後根姜老鼠白石橫石寺塘桂州厓仙女關九層樓。尤極險阨。峽以南山稍廉瘠。而牛腸大岵大寺白銀大灣諸村。亦皆倚江立寨。四寨難通。自紫荆折而稍東。為茶山。為力山。力山尤險。自紫荆折而東北。為沙田。為林岡。迤北折而稍西。為羅運。羅運之險。又倍力山。萬山中。猺蠻盤據。藤峽之巔。立而環眺。則遠近數百里。若可舉趾。故軍旅所集。盱眙而知。急則狺竄林中。不可疏捕。諺云。盜有一斗米。莫沂藤峽水。囊有一陌錢。莫上府江船。明洪武間。羅浮山猺叛。參議湯敬恭死焉。都督楊文與右將軍韓觀分兵追捕。破藤峽寨。所斬獲過當。然賊依巖險。其眾尚繁。兵撤之後。時出行剽。自潯至武宣江道不通者數十年。景泰中。猺蠻侯大狗等作亂。嘯聚萬人。攻墮郡縣。戕執吏民。而修仁荔浦平樂力山諸猺。為之嚮應。其勢益張。守臣惶恐。率

以甘言啖之。賊愈驕縱。天順中。詔有捕得大狗者。賜千金。爵一級。竟不得久之。賊益猖獗。七年。賊夜入梧州城。殺致仕布政宋欽。掠帑金以去。時勳臣陳涇。內臣朱祥俱聚城中。環戍卒數千。部署自守。竟無敢尾其後者。憲宗即位。集廷臣問計。兵部尚書王竑言。峽賊稱亂。其始皆由守臣失策。以招撫為功。長其桀驁。譬諸驕子。愈惜愈啼。非流血撻之。其狂不止。因薦參政韓雍可大任。上然之。乃以雍為左僉都御史。治兵兩廣。以都督趙輔和勇為將軍。以太監盧康陳宣監軍。成化元年七月。雍至全州。會陽峒。西延苗賊為梗。討滅之。戮失機指揮李瑛等四人。將士股栗。九月至桂林。雍謂修仁荔浦藤峽羽翼。當先剪之。乃以永順及兩江土兵十六萬人。五路並進。窮追至力山。諸賊大敗。生擒一千二百餘人。斬首七十三百餘級。十一月至潯州。分左右軍。右軍從武象攻其北。左軍從桂平攻其南。雍與輔勇開府於振嶺。以督諸軍。十二月朔。諸道並發。腹背夾攻。連破石門道袍屋。夏紫荊。竹踏良。胸古。營牛。腸大。岵等寨。賊皆遁入桂州橫石寺塘九層樓。據險立柵。以抗師。雍麾士以大斧刊木開通。兩軍齊登。發大箭。焚其營柵。賊大驚潰。生擒侯大狗等七百八十餘人。斬首三十二百餘級。先是峽中有大藤如斗。延亘兩崖。諸蠻蟻渡。若徒紅。然故以名峽。至是斬之。改斷藤峽。

捷聞。上大喜。賞賚有差。於是奏設武宣縣東鄉巡檢司。以土人李昇為巡檢。貴縣北山巡檢司。以土人陸善正為副巡檢。改周冲巡檢司於勒馬灘。以土人廖政為副巡檢。靖寧鄉巡檢司於獻俘灘。以土人任真二為副巡檢。大宣鄉巡檢司。以零扶寨為副巡檢。大黃江巡檢司。以陸明貴為副巡檢。設武靖州於碧灘。以上隆州知州岑鐸知州事。設藤縣五屯千戶所。以千戶李慶掌所事。詔如雍議。時賊黨尚繁。諸司議留重兵。輔不從。遂撤兵還。是年冬。賊黨鄭昂等七百人。復夜入潯州城。又攻陷北流容縣。民益騷然。奏聞。廷臣論雍等罔上罪。上有之。四年。雍以剿賊功聞。仍慮後患。上曰。雍奏軍功。又慮復聚。功可賞也。餘寇復聚。地方何由寧。宜責雍等督軍滅寇。無徂小捷。五年。雍以憂去。賊勢益張。因從僉事陶魯議。設總督。起雍於家。雍故峭直。與內臣黃沁不相能。為所訐奏。旋致仕去。繼雍者。漸以姑息。弘正後。諸蠻四出。如入無人之境。而峽以南尤甚。橫江禦人。都御史陳金曰。諸蠻所嗜者魚鹽耳。可委而啗也。乃令商船渡峽者。以大小課魚鹽。諸蠻就水滸受去。江道稍疏。金遂自以為功。疏其事。請名曰永通峽。詔從之。未幾。諸蠻緣此征商無算。稍不愜。即掠殺之。必賂乃免。潯人為之語曰。昔永通。今求通。求不獲。葬江中。誰其作者。噫。陳公嘉靖初。王守仁總制兩廣。

檄湖廣土兵誅盧蘇。王受至則蘇受已降。無事兵。守仁亦欲以奇功自見。陽議檄兵而陰圖藤峽。先是各賊聞軍門檄土兵至。皆逃匿深險。後聞散遣諸官兵。無征剿意。皆偃旗息鼓。弛不為備。守仁密署部伍。四面攻圍。賊敗。退據險結巢。官兵攀木緣崖仰攻之。賊奔。渡橫石江。溺死無數。前後擒斬共一千餘名。自是峽南稍平。

志通

嘉靖間。武靖州知州岑邦佐不能鎮輯其下。諸不率者。且受其賂。多曲庇之。故峽以北賊復漸猖獗。其酋侯勝海以衆居鰲灘為亂。指揮潘翰臣過聽土目黃貴章言。誘殺之。勝海弟公丁忿貴章等實利己田廬。遂糾黨大噪。行殺城下。丙申夏五月。僉事鄒閱參議孫繼武言於都御史潘旦。誅之。參將沈希儀沮曰。猾賊未易取。須春水漲。以數千人從武宣順流下。撲之乃可。不聽。遂以千人道潯州擊之。賊先遁去。斬一病者而還。閱與繼武稱賊已斂迹。請立堡戍。旦從之。希儀又言。賊未大創。兵威不振。立堡難守。旦又不聽。六月。堡成。令黃貴章以三百兵戍之。且許以取勝海田廬。不禁。於是諸徭大憤恚。邦佐又陰佑之。未幾。公丁集衆二千人。夜襲堡。殺戍兵二百餘人。貴章僅以身免。旦聞悔曰。果如沈子所料。閱與繼武以啟釁罷位。巡按御史諸演疏其事。且請討賊。上可其奏。乃以兵部侍郎蔡經往代。旦戊戌春正月。經集諸司度。

用兵可幾何時。總兵張經對以不過萬人。沈希儀曰。非八萬人不可。蔡經嫌其太多。翁萬達言於經曰。賊為備久矣。輕進無功。從沈言便。會朝廷有事。安南暫寢。公丁等益橫。時出殺掠。潯人苦之。是冬。萬達以為言。御史鄒亮臣亦贊之。經乃會安遠侯柳珣。定計以兵屬萬達監之。萬達廉得百戶許雄素通賊狀。道之曰。汝當死。能擒公丁。即貸汝。不願效。自贖。萬達又佯謂公丁仇家誣之耳。乃捕擊許。訟公丁者數人。責抵於法。雄懼其首禍。乞東遣人自列。萬達亦佯許之。又令雄假稱貸為賄。公丁喜。益信雄。會達巡他郡。以其事屬參議田汝成。汝成召雄申飭之。雄乃給公丁曰。潯人久以爾為口實。幸不中於上人。今田公新來守。何不自訴寇堡事。公丁然之。隨雄來見汝成。復列冤狀。汝成曰。聞仇家誣汝。已逮治之矣。慰遣之。乃密授意城中居民。被賊害者家。出毆公丁。一市皆譁。遊擊并逮入繫獄。遣雄諭其黨曰。寇堡事。公丁委罪諸徭。須鞫實坐之。若等誠謂公丁冤。須罪人得釋之。萬一事自公丁。當共棄之。勿以一公丁自遭滅亡也。諸徭翕謂事由公丁。聽諭。汝成遂械公丁。詣軍門斬之。汝成因言曰。首惡既戮。賊黨震怖。我兵乘此時加之。必成禽矣。蔡經曰。然。遂料兵分左右進。時張經議欲仍以兵剿之。勿深入。又欲舍紫荆等賊。數勿擊。翁萬達持不可。謂剿之必

無功。且損軍威。令諸徭恣肆。久不重懲之。不足懾其心。汝成亦同萬達議。蔡經曰。峽南亦劇賊。但今兵力不能併。姑緩之。遂格張經議。已亥春二月。以兵三萬五千。為左軍。命張經統之。以副使翁萬達監軍。分六道進。經部下指揮王良輔。由牛渚灣。越武靖。攻紫荊。姜老鼠諸巢。朱昇由三等村。渡蓼水。攻石門。黃泥嶺諸巢。柳溥由白沙灣。攻道袍。梅嶺諸巢。凌溥由白沙灣。攻大昂。小梅嶺諸巢。周維新由白沙。攻藤冲。綠水冲諸巢。孫文炳由藤峽。攻大坑巢。又以兵一萬六千餘人。為右軍。命都指揮僉事高乾將之。以副使梁廷振監。分四道進。乾部下指揮馬文傑。由武宣攻碧灘。綠水諸巢。王俊由武宣入山。攻羅綠上洞。戚振攻中洞。吳同章攻下洞。以參政林士元及田汝成督餉。以副使蕭晚紀功。是月。兩軍翼擊之。賊大窘。遂擁眾奔林洞而東。王良輔以兵擊之。中斷。賊復西奔。遇官軍諸路畢至。奮殺賊一千二百餘。及其東奔者。入羅連山。萬達等移兵攻羅連。又斬首千餘級。賊益窘。賊黨有巧黠者。號於眾曰。往年據險結巢。被官兵殲之。今日不可再聚。於是賊皆漫走山谷間。令官兵疲於追逐。且持日久。糧盡必速退。會有言羅連山古所未至者。賊遁深入。不復窮追云。時平安縣有小田羅應古陶古思諸徭。亦據險弗靖。萬達等又移兵剿之。三月。班師。招賊黨二百餘。

人。峽南胡姓諸徭歸順者亦千餘人。藤峽遂平。翁萬達及田汝成乃共籌處徭七事獻督府。一曰編保甲以處新民。二曰立營堡以通江道。三曰設督備以控上游。四曰改州治以建屯所。五曰清狼田以正疆界。六曰處款兵以鎮邊防。七曰權商稅以資公費。其所陳州治云者。緣王守仁既平斷峽。奏宥岑猛子邦佐罪。令復武靖州知州。後邦佐不率命。殘虐部民為甚。又令提調三縣狼民亦被其害。今邦佐部下多離心。請改州為武靖千戶所。擇人任之。即以三縣良民家之族隸焉。議獻蔡經多採請於上行之。提奏朝廷。晉蔡經職一級。柳珣加宮保。諸將帥守臣等皆賞賚有差。

古田

古田縣在桂林西百五十里。界於臨桂永福義寧雒容融縣間。明初有湖北獐者由黔中入柳桂。性剽悍。其後黨類日滋。浸肆侵剽。村落之間幾無寧宇。弘治五年賊首覃萬賢等據古田縣。都御史閔珪調兵討之。兵至三厄為賊所襲。副總兵馬俊參議馬鉉皆遇害。賊益驕。居民轉徙。僅存城內外三十餘家。省城百里之外皆為賊壘。正德十五年賊入近郊。殺指揮朱鎰官軍。征之不克。賊遂攻陷雒容縣。據西鄉托定洛斗諸村。江道多梗。嘉靖五年復征之。失利。殺指揮舒松等。自是桂林地方歲遭鈔掠。

無敢復稱兵矣。九年。鎮守總兵官張經議立都狼各隘一十三堡。募土舍莫崎領兵守之。無何。經改官。土舍崎亦死。兵日耗。而賊愈披猖。三十二年。賊入靈川城。剽帑金以去。四十三年。首賊韋銀豹黃朝猛等。梯越省城。剽布政司庫銀四萬餘兩。參政黎民衷死焉。變聞。副總兵都司而下。各抵罪。四十四年。賊伏南郊。執署靈川縣事照磨曾傳。掠其印。索贖金始還。是秋。復越城。至布政司及靖邸。俱被敵退。時島夸內訌。兵食交誑。都御史吳桂芳度其時未可輕舉。遣古田守備卜禎典史廖元持文告諭之。上四里獐聽撫。下六里獐逆命如故。因簡都督俞大猷為廣西總兵官。以討賊。大猷作討賊二議。用兵三議。指陳甚悉。隆慶初。按臣朱炳如以大猷議具疏聞。上俞之。廷議征古田。非設重臣不可。因以殷正茂為巡撫。發內帑金四萬供兵需。正茂至。以餉事屬之方伯郭應聘。以兵事屬之總兵俞大猷。二公夙有成算。遂別剿撫。定屯守。酌兵期。度地形。分析條縷。繪圖以進。正茂從其議。乃會督府李遷疏陳可取狀。徵諸路土漢兵。凡十四萬人。分為七道。大猷度諸兵將集。遣把總王綱領募卒分屯牛何三厄。以扼要害。大猷入縣。申以文告。別其順逆。傳檄各兵。約期並進。連破東山鳳凰大巖澗水漾里古城數十巢。賊勢潰。奔合潮水巢。據極巔。大猷統諸路兵合擊之。賊殊

死鬪相持十餘日。大猷陽分兵擊馬浪諸巢。而密令死士三十人。乘雨夜出。賊不意。伏山巔。黎明銃發。賊眾驚潰。馬浪諸巢相繼俱下。大猷復分兵擊碎江金寶頂涼境天井。理定南鄉諸賊。以五年三月班師。凡擒斬首從賊七十三百有奇。餘黨撫定。捷聞。陞賞有差。先是正茂購豹猛二賊千金。獵人黃金線等。誘斬黃朝猛首以獻。銀豹計令韋良臺誘獵人狀貌類己者。取其首及豹皮帽佩刀獻之。後知其非真。檄知縣唐執中等密捕之。生擒銀豹。乃械送闕下。磔於市。督撫二臣用大猷議。奏定東蘭南丹那地三土州官族韋顯忠羅永山莫羅領常安桐木富祿三鎮土巡檢職事。世守其地。立古田守禦千戶所。陞古田縣為永寧州。設兵備參將各一員。覈諸遺田三萬一千九百餘畝。分給諸兵。且耕且守。未幾銀豹餘黨韋狼要者。以其黨叛。都御史郭應聘檄副使莊國禎購狼要擒之。餘黨盡平。於是拓城興學。開荆通道。獠人至遣子就學。而永寧之民始獲安枕。通志

陽朔永福

由桂林以南為陽朔縣。由桂林以西為永福縣。乃府江右江咽喉也。二邑叢岡環亘。民夸錯居。若陽朔莊頭鬼子金寶頂諸巢。逼近府江。永福理定邊山諸堡。距古田尤

邇自古田煽亂。江道為梗。二邑諸巢。無不響應者。明嘉靖初。賊剽村聚掠帑金。陽朔令張士毅。百戶曹恩。俱為所害。都御史應楨。命都指揮鍾坤秀戍其地。而僉事茅坤兵備府江。密陳其可討狀。應楨從之。因部戍土漢兵搗其穴。破鬼子莊頭等一十五巢。斬獲四百餘人。賊勢稍戢。其後古田賊益熾。隆慶五年。撫臣殷正茂。檄總兵俞大猷。大征古田賊。殲焉。遣指揮魯用賢。擒斬陽朔賊三百餘人。設金寶大水田二堡。分兵守之。亡何。賊首廖金濫復嘯聚。堡兵單弱。不能制。萬曆元年。古田賊韋狼要叛。廖金濫等乘機應之。圍大水田堡。殺哨守千戶楊繼宗。邊山諸巢叛者四起。據海灣。越理定。殺傷官兵。尋復與上宋托定賊。襲殺維容尉。勢張甚。時撫臣郭應聘。檄總兵李錫。大征懷遠。密召兵萬人。分戍近地。應聘謀之。憲臣吳一介曰。陽永密邇省城。輟西師以專事於此。固不可。然緩之亦非計。今諸賊聞主帥西行。必不吾備。度諸戍卒可萬人。乘其不意。擊之。誠便。遂與督臣殷正茂屬一介視師。而先事陽朔。萬曆二年春。一介分諸道兵。會金寶頂。大破碎江右隘巖塘涼境廟門徭山諸巢。誅首賊廖金濫。廖金蓋等。俘獲一十二百五十有奇。未幾。懷遠賊平。一介密遣把總李英。論永福諸巢。賊弛不為備。應聘復檄李錫。撤懷遠之兵。潛攻永福。連破海灣白竹黃累恩位。及

黃源六斗諸巢。所至披靡。共俘斬一千二百四十有奇。遂議分兵屯守陽朔縣金寶頂。遇龍翠屏傘山各堡。共戍兵三百九十四名。永福縣大嶺陂角堡。共屯兵六百四十七名。海灣等堡。屯兵二百一十名。覈賊田一萬一千八百一十畝。給兵且耕且守。復設哨舡三十隻。分番哨護。以為常。通志

府江右江

府江上接灘水。下達蒼梧。為廣右咽喉江道。綿亘五百餘里。兩岸諸猺獞。依憑險阻。時時出沒。東岸連富川賀縣。而北抵恭城。西岸連修仁荔浦。而南抵永安。東則有上中下古折。及桂冲石崗黃泥嶺葛家崗諸巢。西則有大小黃牛大小桐江。及礮碌象磯馬尾冲蓮化汀等巢。而朦朧仙迴高天水滌二崗。與五指白冒之巢。皆為羽翼。江介諸嶺。深箐蒙翳。白晝嘯聚。孫升蛇伏。一遇餘皇。鈎而掠之。急灘之間。幾為髑髏窟。其最强者。連藤峽。倚溪崗。縱橫郡邑。明成化初。都御史韓雍在藤峽。先破修仁荔浦。以剪羽翼。共斬獲七千有奇。雍既旋師。賊復蜂聚。都御史朱英下令撫之。立山猺老李公著遣子投款。乞復縣治。為編氓。時參議謝綬在行間。議城立山。遂以其地為永安州。而陽朔鄰邑諸崗。亦以次就撫矣。弘正間。賊首韋萬等圍永安州。流剗府江。指

揮張故為其害。都御史閔珪陳金。後先興師討平其黨。嘉靖以來。賊復煽亂。賀縣黃
崗。巢倪仲亮。鄧良朝等。聚眾剽掠。僭稱名號。都御史張岳。集兵破之。黨與悉平。隆慶
初。荔浦永安之間。反者四起。都御史譚綸。檄總兵俞大猷。畫進剿計。諸所籌畫甚悉。
會綸被召。而大猷亦奉檄東征。事遂寢。逾年。三崗賊攻荔浦縣城。破古架村。兵民被
戮者無算。西岸仙迴諸賊。圍永安州。復要執知州。掠其印。要厚贖。始得出。當是時。道
途梗塞。城門晝閉。永安修葺幾至。陸沉。庚午冬。古田師興。議者謂府江患與古田等。
宜乘兵威并及之。都御史殷正茂。是其議。迨師旋。則春深水漲。兵不可舉。而彪灘龍
頭磯諸賊。益肆傷人掠貨。不可枚舉。事聞。兵備副使陳其樂。坐貶官。是秋。正茂遷總
督。以方伯郭應聘代巡撫。正茂與應聘決計討之。乃徵漢土官兵六萬。以六年十月
水陸分道而進。三崗兵克古西巖口。木魚靛諸巢。西岸水兵克太平古冒馬尾彪
灘仙迴諸巢。東崖兵克黃崗古榴水涯河冲諸巢。賊大敗。追及南源雞籠山。復破之。
凡擒斬首從賊五千一百有奇。俘獲四千餘名口。萬曆元年。乃議城昭平。設縣治。復
添設參將。開通水陸諸道。其各土司官。上中崗屬之名色把總齊凱。領田一萬三千
八百八十畝有奇。下崗屬之土舍覃文舉。領田八千六百六十畝有奇。東岸屬之土

族岑仁領田一萬五千二百畝有奇。西岸龍頭磯諸兵領田五千一百九十畝有奇。仙廻諸兵領田八千二百六十畝有奇。永安高天古帶諸兵領田二千二百畝有奇。各畫地分界設堡戍守。是年冬陽朔辟江賊廖金濫等起南源殘孽復陰助之襲古西巖口據峯門山灣應聘發兵援之千戶張世勲銜鋒手刃三賊被創死各兵斬級二千餘顆奪復峯門應聘復檄參將王瑞統兵合擊之遂破山灣巢南源賊首周公樓等願自縛詣降移募棟兵于山灣分屯諸田據永安扼塞守之復遣總目覃滿等破榕崗諸巢即以滿領其田上中崗獍目楊九昌等相率投招願輸糧編戶府江悉平。

通志

兩岸及三崗皆府江獍北三北五則類皆右江獍也。正德中府江諸獍為粵邊患制置使陳金常請兵擊破之而北三北五獨征伐未之及及征伐則自是歲始也。而是時右江諸獍生齒益繁前是東岸屬平樂西岸三洞屬荔浦延袤千有餘里中間巢崗盤絡為獍獍淵藪於是江上諸偷盜皆倚借為黨援日與府江酋長楊公滿雷公奉黃公東等奪荔浦坊郭平樂樂山及峯門南源諸所執永安知州楊惟執已殺指揮胡瀚千戶李可久周濂軍全朱銓鄧尉二土舍岑文太學黃文堂及兵民亡算而

遷江之北三來賓之北五尤最甚歲歲與東歐西里及三都五都諸賊相倚附。馬多人勁。俗號為剽馬賊。常陳兵走東粵。畧三水清遠諸縣。還入南甯。平南武宣來賓藤貴。劫府庫。已畧來賓所千戶黃元舉家產。殺土吏黃勝。及其子四人。兵七十餘人已殺明經諸生王朝經周松李茂姜集四人。自是之後。白晝皆滿伏道左。奪道左諸過使行李。李副使戴僉事多受其禍。居頃之。南四通逃。首韋明甫。及其子十餘人亡抵右江。謀為報復計。乃鹵武宣諸生米如銀。揚揚騎馬騾千餘來。於是焚大盧等七村。政博樂等二十一村。會舍人張剛佐史周于義遇行間。諸獍執而僇之。奪其所持牒。阻置郵。置郵無敢晝夜行。道上多不得以文書相往來。是時兩江守巡使劉穩沈子木李文績告于撫巡使郭應聘。制置使殷正茂。後先以其狀請。是歲隆慶壬申冬也。乃以李錫為大將軍。而屬參政胡直為督漕使。按察副使金柱鄭茂夏道南為監軍使。龔大器劉廷舉為紀功使。期十月十五日十道並出。而是時諸土吏韋文明。以東蘭部兵至。趙邦興。以龍英部兵至。岑紹勳。以泗城部兵至。莫之厚。以南丹部兵至。岑瑾。以歸順部兵至。黃思。以江州部兵至。黃瑚。以向武部兵至。太錄。以田州部兵至。岑清寶。以武靖部兵至。黃有瀚。以忠州部兵至。黃允章。以上林部兵至。王吳黃正。以思

恩部兵至。馮紀以都康部兵至。韋龍以鎮安部兵至。羅世瑯以那地部兵至。鄧承印彭大武以永順部兵至。許世興以上映部兵至。岑壽松以湖潤部兵至。黃一貫以遷隆部兵至。黃鎮以安隆部兵至。於是王世科提東蘭泗城永順安隆湖潤兵攻古西巖口破之。斬首捕擄二百有四級。復攻平滿青龍破之。生得八人。斬首五十四級。餘黨奔入笋山古造阻山為巢。泗城東蘭兵搏戰。斬首三百五十三級。已疏捕諸山。斬首八十四級。餘黨復走南源雞籠山巢。追逐斬首二百二十二級。還攻西南青殿木魚諸巢。斬楊錢甫楊公滿楊朝猛楊扶射莫扶金莫扶楊等首三百六十一級。錢鳳翔提田州忠州龍英武靖遷龍兵攻東岸黃洞古榴糯崗破之。生得黃公護蘇公韋斬唐義婆唐會婆袁婆沈婆首一百一十三級。攻黃泥嶺水涯洞。生得黃公送斬首一百二十六級。疏捕何冲莫家冲。斬首二百一十級。餘黨奔入倒流苦竹蒲巖諸山。追亡斬首四百一十六級。王承恩提田州兵擊龍巖破之。斬首二百二十二級。奪獲被鹵二人。復提思恩鎮安都康兵擊西岸馬尾及勞碌黃牛諸山破之。斬周添郎鄧琶婆盤滿婆盤賤婆鄧郎等首一百二十一級。餘黨奔入仙迴高天古帶諸山。疏捕仙迴西岸。生得四人。斬首一百五十二級。守備康仁生得一人。斬首二百八十四級。

進攻高天泗城兵先登斬首一百二十六級我兵創五人餘黨悉遁追亡逐北至古河中斬黃公東等首七十一級復疏捕西岸斬首三百一十三級董龍提歸順南丹那北上林兵擊太平古冒馬尾破之斬雷公奉王公社等首一百四十一級奪被鹵一人復攻唐冲彪灘破之斬首一百一十七級田義凌文明提向武江州奉議上映兵擊兩岸破之斬鄧遵等首百一十七級復攻南源雞籠仙迴高天斬首捕擄一百四十一級是歲萬曆元年春正月也大率斬首凡四千六百六十七級俘獲凡四百四十八人奪獲被鹵凡三人牛馬凡二百三十三頭器械凡二百一十有九前是給事中梁問孟上書請征兩江諸酋欲相度先後機宜以行於是右江備兵使沈子木移指揮使于碧蕭紳令奉檄入北三北五宣朝廷威德趨歸降會峒老韋法真等同原鹵來賓遷江民蒙演蒙葛眉等具盟誓詣備兵使所願歸所奪田輸賦請以漢官式臨之當事者具報可於是蒙演等得自新而李良臣李純唐鍊先後為巡按御史具得其狀大會撫巡使郭應聘制置使殷正茂並奏于上下本兵議尚書方逢時俄覆奏詔賜殷正茂金五十兩表裏二進郭應聘秩一等廕一子入太學李錫秩二等皆予金三十兩表裏亦如之已撫巡使及制置使大會布政使楊成參政胡直李鳳